

寄庵詩文鈔

乙酉仲春五日寄菴先生來昆明省墓過訪卽園信宿  
而去臨行手壬午訖甲申詩鈔一卷授陽屬作序陽適  
攪疾遲遲未報命暮春三日先生書至云序文可隨鶴  
寄來先是壬午冬陽購得四鶴先生癸未秋來昆明見  
之意欣然陽請籠其二歸以無擔鶴者不果今歲來  
復請攜歸亦不果附書人至詢之卽擔鶴人鶴遂行有  
日矣序文其容緩耶請就鶴序鶴一羽族耳而當翱翔  
霄漢也奚啻人之大展其志耶當棲息林泉也奚啻人  
之善全其身耶其品格孤高也奚啻人之嚴厲持躬耶  
其性情恬淡也奚啻人之寬和接物耶先生誠人中鶴

耳世固多庸妄俗物昏不曉事而示以鶴未有不謂其異於凡鳥者卽示之以先生未有不謂其異於時流者先生所傳詎在語言文字乎然鶴以聲鳴聞于天先生以詩鳴聞于世相鶴者原不僅以其聲相先生而不易得者抑又何妨僅以其詩哉先生於詩少所許可惟陽深蒙眷顧屢賜品題竊聞先生宦山左三十年不通一賄賂不留一餽遺皎白廉名婦儒咸稱迨授學五華也弟子執贄除食物外無所受乃今貽先生鶴而先生不辭意者愛鶴甚於愛陽歟先生授學九載出門下者科甲聯翩不可勝計陽獨以不舞之鶴爲先生羞孰意先

原缺

僻處偏隅鬼盜紛乘屢百歡一十餘年矣然未有如今  
乙酉之甚者荆心棘目不言神傷況敢形諸詠歎悲情  
所由亦復不能自已遂致集成卷軸屢欲投之水火轉  
念此自紀吾一身一歲之事因附四集之末大寒後  
日覆閱之聲音之道與氣機相感通集中工拙不待論  
豈復有一優柔和平之奏足以供清廟明堂之選者益  
非詩累人人累詩耳因憶余自乙丑歲得請歸養其時  
老母尙康強諸故人皆無恙問視之餘卽相與傲游山  
水坐臥泉石間杖屨所至不廢觥籌朝出暮歸無一毫  
艱辛形狀見者或至羨慕以爲神仙中人曾幾何時遂

一一不堪回首如是耶自念家居無大過惡足致此者  
惟好爲詩憂危哀傷老猶不止是怕惡處明年且八十  
歲矣庶幾其改之乎陶淵明云悟已往之不諫知來者  
之可追實迷途其未遠覺今是而昨非吾請三復乎斯  
語大紳

寄菴詩鈔附續卷十

乙酉

雲南劉大紳

卽事

春花與春日晝夜分娛人一時窮愁客不復潛悲辛陽  
和氣相感東皇本深仁況值上元節燈光燦星辰荒州  
固僻壤同爲太平民笙簫亦間發裙屐踏清塵盡將抑  
塞態歛之變溫醇野老雖衰頽行踪殊隱淪鼓腹何所  
樂三皇世如春

惜春

惜春如往日桃李亦依依花擁樓臺出香迎杖屨飛不

愁詞賦拙只恨友朋稀紅紫門前路相聯入翠微

海棠

纔覺髻垂已髮黃腰圍尺寸不堪量是因詩瘦因花瘦  
又向東風賦海棠

棠梨花飛

欲繼詩才賦雪車春晴五出不飛花風飄十丈棠梨樹  
日庭階擁玉沙

鴉挽髻笑相將手提闌花意自忙若向謝庭同賦雪  
西風柳絮較低昂

答戴古村



春花看罷着春燈春酒樽前我亦能病退山林無鬼守  
詩成草野有人憎專家自喜多門戶遠道相思幾友朋  
正是昆明風浪靜訪君舟楫興須乘

溫李風流冠晚唐兩年不見最難忘南雲有彩紉星象  
北斗無情酌酒漿賣藥多栽紅杏樹稱詩亦在碧雞坊  
海棠依舊經春雨又疊韓衫韻幾章

寄李卽園

時從枕上憶昆明長記前年聽雁聲名士杯空荷未謝  
老人袖落櫺還傾春來花柳無寒態客到湖山有勝情  
海鶴較量肥瘦異乘軒可復似公卿

桃李

桃李一年逢一春  
名園野圃盡生新  
花開如醉還如笑  
不識窮愁尙有人

小園

平生夢想到三山  
簷背飛帆賦海還  
老向小園春色裏  
一編詠就署花間

陶謝文章本自然  
庾徐詞藻亦流傳  
詩才不似春花豔  
笑說香奩是少年

山中看桃花

一曲清谿出碧岑  
欄歌杳杳入雲深  
偕來半是漁樵輩

同有吟風弄月心

西母瑤池境屬仙荒唐歲月紀三千山中甲子無人問  
開到桃花卽一年

桃花四詠

夕陽 流水 馴犬 閭牛

及此遲遲日桑隅不用嗟夕陽原自好更與照桃花  
舊痕沙漲淺新意雨添多不送飛花去無人擊楫歌  
采藥尋源至柴門斜不關花陰無犬吠一片白雲閒  
仙人種瑤草紅樹繫青牛騎渡桃花水安於駕小舟

海棠四詠

懷杜 懷蘇 懷陸 懷范

閒關身入蜀築室浣花溪冷落海棠樹杜鵑枝上啼

定惠院東山蘓髯五醉還土人留不伐一笑竹籬間  
聞道昌州好錢塘亦有香千年看不足何似碧雞坊  
十千買一株豪興與人殊每歲移家賞終憐范石湖

將出游再寄李卽園

夙昔望遠道無日不相思及至將出門心如相忘時會  
晤卽有日夢想勞何爲峻極太華山清澈昆明池丹輿  
任所適晝夜常歡怡不到興盡處爛漫多文辭曠懷千  
百世歲月輕推移前人我不見後人我何知我後又有  
人復知我爲誰若不早行樂負此百年期明卽登長路  
今更寄一詩愁病兩消盡門外春風吹

西鄰看牡丹

出游吟倦牡丹枝歸到空山不說詩長記鄰家曾有此  
偶乘暇日亦相宜迎風恰散曉烟重含露勝經春雨遲  
一種閒愁消暑盡無端又欲賦將離

至昆明喜晤卽園古村諸老友

天高不碍積雲霧地濶何妨遠道路精神所注無險艱  
千里百里卽相遇昆華勝地知己多雄文高誼誰復過  
無端荒村抱病臥聯床夢想同嘯歌忽然身立鶴羣裏  
翠竹碧梧亦色喜十年杖屨踪跡存蓬壺不隔海中水  
相見未暇言相思快譚仙侶曾游時九龍秋池月明夜

朱櫻綠李分小兒恨我今年到不早孔蓋鸞旌去已杳  
碧雞山映金馬山一曲陽關尙曩曩日携鶴人奇句歸  
天仙地仙心不違踰關越嶺本容易重來肯後鴻雁飛

自玉案山墓祭歸

玉案山頭去卽回椎牛菽水總生哀墓雲子舍移寒暑  
計日天時換柳梅恨未倚廬松柏裏終當買宅翠華隈  
浣江古廟聽鵲處殘夢悠悠繞夜臺

大平山墓祭

盼得天晴好上墳昨宵猶未斂浮雲石橫半道崖曾圻  
草塞前山路不分望見墓門神尙惕跪陳俎豆日將曛

哀兒更有傷心處合葬空傳古禮文

哭陳仰山

留君長不死正有看花情靈藥猶傳訣高譚早達生何  
人能誌墓於我屬銘旌心許口難應悠悠金石盟  
握手三宵後傷心一夕餘鄉鄰已作誄朋友尙傳書夙  
望生能久今知死不虛何堪元伯柩空待巨卿車  
三同君與我一死不能同市冷碎琴月并寒投轄風他  
生緣或再此際恨難窮金碧堦前地休翻芍藥紅

題戴古村芍藥詩後

坐對廣陵花萬枝才人得意有如斯漢宮飛燕受風處

越女浣紗臨水時爛漫留春添宿釀殷勤贈別益新詩  
少游自是六朝體山石何須拈退之

招鶴吟

誰能西南借長風吹送六翮來晴空郁郁紛紛亦希有  
置身難問青雲中昂昂高軒是何物文繡重茵尙嫌屈  
國人嘖嘖如病狂往年讀史色爲艷荒村野老乘藍輿  
逍遙山水歡有餘鸞鵠鳳駢忽相遇狹巷引避慚迂疏  
仙禽若用此興致左迴右翔不如意清風明月空相招  
况敢樊籠鍛雙翅丈夫許身知已間片語其重如邱山  
精神到處無胡越豈因險阻生愁顏與汝旣成莫逆友



千里終當遠爲壽可惜故主多文辭海內一時少敵手  
去留徘徊日頻瞋一聲清唳天應聞朝發昆池夕浣水  
青田况味幾無分我訪仙李期明載詩壇金石舊盟在  
與汝相伴長途間增長風流定十倍

定痛放歌

有手尙欲揮雲烟有足尙欲凌山川采樵路細飛鳥盡  
雙杖斜倚雙屐懸平生行止聽自然捷徑疾足輸人先  
何至山鬼橫相苦脛骨痺筋拘牽左足正直右足偏  
月魄初生過月圓黃帝岐伯去已久老讀素問難終篇  
有時作書拂蠶箋濃墨空磨端石穿字體側傾蚓蛇走

秋兔毫尖腕無權有時小閣張華筵綠蟻酒浮紅螺旋  
歡情未合遽中止惟將白眼望青天足痛民痛精言詮  
傷心傷國愁相連倘能忘情若草木甘爲元者何必全  
老妻白髮披盈肩終苦撫摩心志堅童孫戲娛競跳躍  
轉令老人思少年少年氣象真安便飛跨騏驎揚長鞭  
卽今寸步行不得參朮乞靈日熬煎昨夜夢到洙泗邊  
肅立端侍先聖賢一時道體忽呈露皓鶴鳴皋魚泳淵  
又夢身受虞舜田象耕鳥耘獲豐年催科不煩吏不擾  
熙熙皞皞三代前飽食嘉穀飲甘泉同并壽命皆彭錢  
爾時疾病歸何處母乃和緩爲醫痊耄耄期願自堪延

更不夢裏求神仙  
弟願炯炯此心在  
豈因一足妨高眠  
待鶴

重門扇扇開  
長簪埽塵埃  
今日尙虛望  
前宵應早來  
田間朝鷺下  
嶺上晚鴉回  
恐是行人悞  
遲留野水隈

鶴到寄卽園

四月三日

歡忻情未已  
慚愧少林泉  
知己何論地  
同聲好問天  
鶴羣離夢擾  
遠道曠懷牽  
長憶名園裏  
狂歌有謫仙

次日和卽園四長句

仙禽只合住仙壇  
竹月松風飲啄寬  
增繳一辭修翮長  
樊籠再入短毛殘  
可能僻壤多名士  
未必新交勝舊歡

飄渺樓臺回首望紫簫吹徹白雲端

憶昔風塵拭淚痕廿年趨走忘朝昏  
鵲寒老樹棲烟夢蛩冷空庭泣月魂  
瘦馬影猶垂麥隴拙鳩聲已出花村  
無錢聘汝鳴琴後今日相隨臥小園

隴西佳士最能文愛汝雙雙迴出羣  
賣賦得金揮欲盡開籠娛客指相分  
我於此事貪情見誰是同時俠氣聞  
學鳳輕雞固應爾還當臨別語慇懃

買宅移家少定棲堂名仍襲舊潭西  
身餘瘦骨如雙鶴自負孤標共一溪  
磊落長人無畫似飄零老子有詩題  
終傳好賦青蓮手並世風流敢與齊

寄戴古村

百代文章不共趨英雄兒女品流殊數昂臂奮千鈞弩  
宛轉喉歌一串珠白以風騷歸大雅誰將姓氏廁庸奴  
五芝炳炳成祥瑞鄭重空山采藥圖

題卽園雜詠後

子昂感遇後太白有古風周楚無風騷此才誰與同抗  
志凌烟霄冥冥兩飛鴻模擬多後輩衆雌無一雄勦襲  
固可鄙叛離亦徒工韓孟豪傑士秋懷千古空盆世新  
樂府吾師杜陵翁

昆華萃羣才各各蜚其聲離西更傑出懷古餘深情寄

托人不識議論天爲驚一時賢雋士無敢輕老成孤鳳  
下層雲大海翻長鯨不顧鯢鯢舞何問烏鳶鳴

萬里車書通冠蓋塞長道姓名爭千秋尙恐人嫉媚青  
溪有道士私自服瑤草從之可飛騰游戲蓬萊島島上  
多神仙僥倖頭未皓相見喜貢談乞食如瓜棗富其帶  
已解難必處還倒非不欲徇俗恐失吾所寶

鄉人觀鶴者全集賦詩三首

荒村倦翮息斜暉仙路塵寰一夜分天外鳳鸞同作隊  
堦前雞鶩各成羣人皆玩鶴翻相警我自彈琴若不聞  
欲借孤山清絕處築亭馴養伴閒雲

昆池小別欲經旬何事相招浣水濱  
綏嶺高飛纔出衆  
華亭清唳始離塵  
眼中自信無餘子  
夢底難忘有故人  
稍待秋風明月夜  
群游萬里御飈輪

還鳥歸雲已有時  
傍梅畜鶴寄相思  
不曾作吏餘清俸  
且幸從仙得紫芝  
樹影橫烟歸別院  
泉聲赴雨入新池  
東門故友今如在  
早到西山和小詩

次日又爲一詩

報客連朝亦覺繁  
雙禽竟不避群喧  
知爲紫府何仙驥  
識是青田幾代孫  
凡鳥巢空留大樹  
野人歸久謝高軒  
傳書待往空中去  
約聽深巖夜嘯猿

行莎草上適甚小吟

足痛未忘情徐徐藥後行屢停莎草軟杖曳竹枝輕適  
我田間望看人道上爭少年強健甚捷得亦先傾

卽園來札有芙蓉院冷知已人稀之語感而賦詩  
虹橋影斷蜃樓空猶自依依入夢中事不身親疑幻妄  
人如情少豈英雄君臣遇合有終始兒女綢繆無異同  
楚客沅湘悲憤後茂陵亦復怨秋風

內弟張配三至雨中對酌

蕭蕭竹梧宅四山風雨來故人扶杖至新醞列罇開白  
髮相憐在青禾盡喜栽村村田水滿飽食不須哀



對鶴長吟

鳳聲寂不作鶴影亦有數悵望古仙人騎向丹霄路萬  
里飛一瞬蒼茫失烟霧招之不下來何時通情愔少保  
畫自工少陵詩徒賦空想青田姿風流曠代遇忽從好  
友得歡喜聯寐寤轉悔卅年前琴堂少鶴步細讀淮南  
書妙領浮邱趣相視可忘形豈爲燕雀顧鷹鷂肆搏擊  
反因拳爪悞鵞鴨爭喧呼盡緣飲食妬惟爾高品格氣  
量亦兼裕昂昂立庭堦紛紛來雞鵲直若無見聞不喜  
并不怒清者多絕物孤者衆易忤大雅誰似汝固宜共  
風雨相待更幾年變換蒼白羽翼我白玉京彤闕班鶴

鷺乘興上崑崙群仙宴元圃然後歸鄉園種梅一千樹  
新交與舊交花開日會晤醉聽清唳頻醒看善舞屢曠  
然天地間萬古一旦暮此意丹穴中有鳥知其故

狐裘吟

五月披羊裘負薪人自竒有金不肯拾延陵翻見嗤狐  
毛更溫厚甚寒始相宜竟先天地冬向穴謀其皮裘也  
非鐵衣服久必敝之恐不三十年蒙茸空賦詩又恐留  
客醉脫付當壚姬窮秋振葛紵拂拂涼風吹人生貴適  
意亦須不違時暑寒失氣候四季難轉移自問胡爲爾  
老翁殊小兒居高慎視下休言路旁遺

詠竹筍

叢竹凌空去不止天矯如龍五雲裏回頭顧語群兒孫  
滔滔江河幾曲水有甲盡坼萌盡勾百草尙未甘埋頭  
爾獨何爲守寂寞不與青霄同戲游一夜雷雨起潛蟄  
振籜籜苞在呼吸纔出泥土旋拂天空山幽篁鬼止泣  
枝枝葉葉長琅玕纍纍垂露傾玉盤神仙服食吞且吐  
瀉地齊作光珠看清貧太守不食肉胷中飽有千畝竹  
若非醉墨能寫生孤負此君亦近俗我無畫手栽滿園  
肯與蔬蕨供盤飧封侯參禪並瑣瑣玩弄自許朝連昏  
陸沈此中計已熟肩輿客來亦不逐茅廬更得三兩楹

寄菴詩鈔續附卷十  
池上波間伴鶴宿時時曳杖庭階行視之有勢聽有聲  
笑耶怒耶皆可喜蠢蠢衆庶徒馮生

憶金碧草堂

君園卽我園君逝我徒存易著重來屐難傾共飲樽鶯  
花留曲徑風月戀重門詞賦招何益汗流不返魂  
吳井橋邊路前年立夕陽但逢飛蝶至似帶落花香柳  
外高樓幾處聞小閣藏未能親杖屨輒欲話羲皇  
老成凋謝易高尙舊無人歎我空懷古輸君早出塵烟  
雲供養久泉石嘯歌真館舍捐何遽遙望每愴神

獨酌

臥病客來不共飲杯盤酒肉空紛陳病愈思飲無客至  
陶然獨酌祇一身西山清風久歇絕東海又復停月輪  
生平知己此二物捨之與誰爲主賓俯首忽然見我影  
窮愁恰配形與神醉中頗覺慰寂寞不待風月成三人  
逢迎尙有影外影厥名罔兩難相親觥籌交錯日西下  
嶺頭簷諸色作銀纖阿更爲促玉兔齊駕嫦娥嬉水瀕  
風聲無約拂拂起瀟灑六合清埃塵我欲停杯停不得  
餘瀝沾濕頭上巾便欲盡傾舊藏酒呼兒急急招四鄰  
一年有幾風月夜龜魚剝落休言貧相圖醉酺再三醉  
沈疴去體吟不呻

憶弟熙敬

時寓右所小營

依人堂廡下流落盡天涯蕭索憐吾弟蒼黃就此家弄  
孫聊白遣對婦只長嗟得意何鄉鬼呼鴟又聚鴉

憶昆華同遊

欲問昆華士詩中幾酒樓泥塗三百里絕少寄書郵離  
夢不因雨悲懷全似秋浮雲能作騎乘汝一遨遊

憶保保孫

一室諸孫繞孤樓汝獨居閉門經幾載仰屋藉何書糠  
覈三餐後裳衣百結餘可能來往客相與式窮廬  
不幸昆池畔黃泉委汝兄雲山空悵恨魂夢未分明二

老將何慰諸孫漸次成三年無一面木石亦多情

賦是詩後十餘日爲乙酉六月二日始知吾孫保保  
已於去歲又七月十日身殞矣家人以余老秘不使  
聞也孫丙寅生得年十有九歲耳閉戶四年不接一  
人自居樓後盆余亦不復見奄一旦溘然長逝哀哉

閒吟

屏山臨帶水挾冊坐中央雨落桐花細風抽竹筍長  
人文字刺娛老歲時忘茶茗風流事身閒不覺忙

馬子雲寄詩集盆西藏葡萄雪山茶至賦答

大觀樓上秋風哀一聲鐵篴何壯哉浦中大魚昂首出

長空鴻雁相徘徊穿雲裂石勢不止逆浪倒流五百里  
腰間飛出紅毛刀要入洪濤取蛟子飲酒賦詩朋輩多  
豪宕感激齊悲歌西山白日竟謝客餘光閃鑠辭林阿  
廼飄賦歸未幾夜長鞭影停雪山下鸞鵠品格難形容  
萬丈銀龍見聲價我方伏處漁樵班農夫牧豎時追攀  
里巷謳謠聽欲臥風吹玉瑄來空山於今奇材復何有  
詩人詞客別亦久得君戴李爲驂駢荒陬尙能慰衰朽  
筐篚千里還寄將西域葡萄滋味長茗柯浸淫玉壺水  
顧渚未敢爭旗槍芹根蕨芽壓野老閨桂綏桃市上少  
茹含精華松竹間吐棄莒歎擲羊棗忽然憶及漢張騫



附會乘槎牛女邊君平解識支機石客星一犯今幾年  
又想唐家天隨子茶烟裊裊荻蘆裏五湖三泖終一身  
暇卽舟中閱圖史於斯二者承下風博望畢竟輸龜蒙  
便欲唱和皮陸後正恐有人笑雷同

夜吟

鬼氣東來月影西山村一片草萋萋欲從海上求仙宅  
借向人間得穩棲走竄青燈無怪鼠呌回白日有雄雞  
民生漸使歸仁壽不聽鄉鄰晝夜啼

寄答戴古村

相思輒檢舊瓊瑤長畫荒村慰寂寥十樣箋重垂鳳尾

百緋珠、又裹鮫綃饑年午餉新炊飯病日晨遺大藥苗  
更喜秋風知好事冷然已上竹梧標

唱和不辭千百篇心如花發思如泉陳風好寫窮簷隱  
製曲羞翻貴主筵人撤舉比無弟子常揮麈尾有神仙  
怪君四載猶依戀未必師門遂覺賢

楊丹山寄縞紬衣一稱受謝

臥病不辭廉吏衣三年前已判癰肥短長萬里裁縫稱  
出處終身被服稀賓客都言宮錦重妻奴轉訝野蓑違  
封還遺鮓思慈母對此翻疑取與非

寄戴古村

傢嚮艱難不暇憂今年腐鼠積成邱荒原逐臭烏鳶樂  
聚窟尋香藥石羞歌哭無常殊旦暮仙凡有界異春秋  
壺中願借閒田地營作人間萬菟裘

感遇

此生垂老尙如孩長笑侏儒是不才林莽望穿森玉樹  
鄉村夢斷矗金臺醇醪欲飲呼星下險韻將分趣月來  
久識入山同志少物妖莫更苦相摧

當年艷說築臺時我亦曾經易水湄生土何心同死駿  
後臣難得是先師膠庠有養人方貴幣帛相招禮不衰  
太息浸淫秦漢世侯王戮辱盡心知

夜雨

雨聲今夜不會休  
庭闈縱橫水亂流  
定有鬼神相上下  
盆無星斗共沉浮  
鷓鴣早擇子  
尋木蟋蟀纔驚幾日秋  
最苦遠鄉多疾病  
市廛遙隔藥難求

山淺

慣說巢由不買山  
烟雲亦恐近人間  
桑麻課罷杖須倚  
泉石吟餘門自關  
蕉葉未舒僧乞紙  
榴花欲實客探環  
應酬總是無聊賴  
輸與松風鶴夢閒

悲愁無以度日  
惟取卽園古村惠詩讀之稍解因

賦寄

鼠腐鴟張太不宜合編留與興愁時天開五色雲成瑞  
海擁三珠樹出奇魏國愈風琳有檄唐家社瘡甫能詩  
寄來更莫經旬遠散盡今秋宋玉悲

李載亭病故

避災如避寇出走歲時遙古廟殘燈檠孤村破酒瓢病  
纔聞昨暮死已說今朝一夜分人鬼無由續二招

月夜寄李卽園楊嶰谷曹瑤圃

蟾兔於人最有情年年八月更分明凌雲賦就天無碍  
犯斗槎來海欲平酒盞誰辭醪味淡衣襟盡染桂香清  
相看萬里乘風便攜手蓬萊頂上行

寄阿象山陸漱圃杜蘭江莊厚田牛黃厓木義民

段章五

鳴蟬唳雁赴涼秋驛路風雲亦壯遊  
送別千峯多北向  
迎來一水自西流  
采蘭賦柳懷遷客  
拄杖推碑弔古邱  
賣雪點蒼山下  
嫗閒中笑問姓名不

秋清

穩住田間不入城  
閒庭鶴影倚秋清  
妖氛鬼氣風吹盡  
聽澈傾盆落稻聲

病起徐徐衍竹枝  
風聯雨斷不嫌遲  
柴門剝啄聲相應  
正是吟成欲和時

夢昆華諸故人相過賦詩飲酒歡如平生

良朋不易到茅楹燭影搖紅劍影橫半夜嘯歌聞鶴唳  
一天風雨聽雞鳴烟雲聚散原無定鳥獸悲歡各有情  
遙想諸君同夢後齊從枕上賦秋聲

雨愁

暑雨聲多已倦聽秋來又復積中庭睡餘隱几惟思夢  
病後銜杯不願醒聚鐵當年曾鑄劍造舟何時可揚舲  
求仙學隱俱無用誰寫蛟龍作畫屏

不堪

不堪塵世寄蜉蝣慶弔相循此一州浪說人方眠巨室

深慚我未泛虛舟元猿淚濕三更月白雁聲寒萬里秋  
南極有星如再見彩雲深處共嬉遊

死日生年重泰山其知壽夭不相關當時正得成仁處  
非是何如駐世間耄耄金肩遊化國老更攜手抗仙班  
逢人笑述兒童事釣弋林泉歲月閒

讀白沙集敬題

濂洛心傳在致虛陳白沙鳶魚歸日用星斗見精華曾  
應帝京詔欲移衡岳家真儒活孟子當日語非夸  
見大心常泰辭榮道自尊言詩兼邵杜有母足養殯終  
老前明季誕生新會村一臺高幾尺千古仰師門



自遣

一山一水結廬小蓬萊夢斷神仙杳王侯螻蟻同不悲  
十二萬年天亦老

憶菊

黃白二種李乙觀已攜至城中

今年何幸嘯秋林霧慘烟愁百鬼侵向極難時留晚節  
從孤賞處得同心一杯酒引幽人興獨繭絲彈太古音  
若更殘枝求別圃倦飛蜂蝶懶相尋

秋容聞已至城中黃白平分造化功處士傾心盟皦日  
居人洗耳愛清風成仙不待桃千樹招隱時憐桂一叢  
汲取浣江橋下水浸淫甘谷許相同

穫稻人家不暫閒  
傍徨躑躅一村間  
初非俗物難摩手  
第是詩家必抗顏  
明月先來籬畔水  
輕雲亦到檻前山  
衡門信宿嘉賓客  
爲汝遲遲始上關

憶李子煥

百年忽忽暗中移  
蕭瑟秋風到不遲  
緩見菊花三日後  
難逢李子再生時  
琴書劍履曾相擔  
雪片烟雲亦共馳  
何況瘠田耕稼苦  
汝家兒女淚常垂

愁思

愁思埽難開  
愁腸是幾迴  
酒星天不借  
詩聖世無才  
養氣真精在  
求心大道該  
高樓試一望  
明月海中來

菊至

倚門人似菊入室蝶隨花一擔清秋氣孤村野老家粉  
墻燈影碎茅屋月光斜種秫新成酒壚邊不更賒

中秋

流年如矢馬難追莫笑村翁素髮垂白晝看雲常倚樹  
黃昏待月早臨池家鄉幾度中秋夜杯筯何殊壯歲時  
玉斧仙人應記我醉憑樓閣苦吟詩

常恐清宵對月愁情深興淺怕登樓古今汎汎歸詩帙  
天地飄飄入酒甌有客狂譚遭衆毀無人熟醉爲身謀  
海槎若使如期至只愛酣眠不浪遊

見雲短歌

澹澹雲間見月痕清光猶自照千門鄉村一半歸黃土  
袖得天香可返魂

吟詩唧唧夜相聞鬼語人聲兩不分攜酒欲從何處去  
半林落月挂秋墳

夢遊飛雲巖

巖壑烟雲在來遊路不生漁樵還問姓猿鳥盡知名半  
日壺中住千年世外行何人同入夢猶自整簪纓  
覓絕牂牁郡恬然枕席過一隅塵世遠半夜逸情多遊  
倦雲同住詩成石可磨謫仙歸去早無句到巖阿

對菊短歌

經年臥病從來無黃花幸與爲歡娛  
遠觀初如澹墨畫近視著色秋林圖  
饑餐渴飲相與俱有竹不彫桐不枯  
忽然思及彭澤令更懷楚家屈大夫  
醉魂醒魄遙可呼烟飛霧結霜平舖  
當年清濁少分判後代憑弔空嗟吁  
如何不飲常憂虞坐看冰雪盈髭鬚  
千尊百榼尙能辨一首詩成傾百壺  
有時鄰村滿眼酤不假白衣假青蚨  
半酣賓主忘酬酢大醉兒孫忙掖扶  
魑魅魍魎齊剖剖此物竟可當湛盧  
妖菁魔領避何處小視虎艾并劍蒲  
朝栽暮培人非迂雜杞金蘭甘心輸  
要將風騷嗣正始

肯逐荆棘付樵蕪

對菊

城東移植向城西秋色秋容轉隱栖  
自傍晚烟留雁陣不依春雨管鶯啼  
樓前片月同三徑竹外孤松共一谿  
清節高風誰得似首陽山上薇齊

曉起

曉起心無營獨立庭階前秋菊自蒼翠  
枝葉俱挺然氣靜神斯凝志一視以專  
肅穆無怠容如對古聖賢亦祇是草木  
却不爭春烟風霜來有時遂若洪鈞偏  
萬物貴處後敢爲天下先奈何同類人  
擾擾多少年

嚴霜殺百草天地爲之愁笑視籬落間惟菊無所憂勁  
節兼正色寂然處巖幽險阻經備嘗天人泯怨尤志士  
不遐棄在遠相窮搜得之忘食寢術業因以修物自盡  
在我於人本無求人苟能如斯仕隱皆優游

### 菊影

此花逸興已翩翩別有神情藉影傳夜靜堂空橫素月  
家貧壁立帶蒼烟短檠攝取燈如豆巨幅臨摹筆似椽  
慰藉無人時自顧秋風何必盡相憐

### 曉起

自欲臥遊徵士家無端一夜誦懷沙醒來不及思量夢

纔下床時看菊花

彭陶仁招看菊花飲酒暮歸同汪趙二君送至浣

江橋頭始別

彭子不諧俗欲與古人處古人去已遠茫茫在何許秋  
風籬落間時時共晤語苦恨春夏交厲鬼挾腐鼠仲蔚  
辭舊居蓬蒿獨愁予落日一歸來有酒不暇醺何幸黃  
華開猶能共含咀且復中聖賢未敢歌爾汝

春雨曾過我有約度重九遙遙尙半載神飛早左右今  
日真相招扶杖便疾走陶公多子孫邑氏未嘗有君非  
其苗裔千古能尙友陶然一室中采英泛大斗共酌無



襍賓談諧萃鄰叟感君樸質風竟忘坐飲久浣江橋下  
水迎送正清瀏黑夜聽有聲詎必若鯨吼歸臥衡茅間  
自喜神先受佳哉色與香在眼復在手

憶菊

若向黃花徑底臥  
驚側風流未足過  
苦留不住昏夜歸  
浣江橋頭踈星大  
夢中有酒清不渾  
何人往叩陶家門  
秋柳寒蟬路三里  
曉起曳杖望前村

欲重往看菊不果

衡門如市人如歸  
背郭孤村山四圍  
婆娑高柳落葉下  
指點長空鴻雁飛  
今年秋興茫無處  
半日黃花影裏悵

重來筍輿不得閒  
竟似春水迷前渡

次夕陶仁送菊至

竟馭秋雲至  
多情不待招  
開樽思昨日  
舉燭慰今宵  
蓬華居原陋  
田疇路亦遙  
笑看西嶺月  
飛上浣江橋  
想送門閭候  
言窮意不窮  
殘林搖落葉  
斜日御回風  
此處秋多興  
君家菊已空  
重陽須就我  
頽放酒杯中

對菊長吟

花譜陳群芳  
聞名卽欣羨  
企望經多時  
秋清始得見  
縱當春與夏  
何至爲人賤  
幽香要終秘  
孤標恥自衒  
高樹挺枝葉  
力與風霜戰  
質堅如晨星  
飛流滿庭院  
後出直

爲常孑立無少倦遂令山林間獨爲造物眷治爐鑄黃金精神出百鍊乍睹情輒深久交誼逾善人世苟無此豈不枉縉纒吁嗟吟菊人風流誰能擅

九日上後山高處

難得重九晴何可竟虛度我友望不來獨自領其趣秋色無遠近高下入指顧八方尙有域上視杳無位不知九萬里可有入行路我欲窮所終恨未生兩羽且向此山頂悠然適杖屨天地通呼吸古今猶旦暮茫茫千載前連袂幾人賦不待後來者相賞得意句後此未百年陳迹又如故誰知我生前喜樂與哀怒平地且如此虛

空何足慕多人求神仙徒爲方士誤紅日東飛烏白月  
西走兔閒情偶寄託姑且托豪素豪素亦有窮燈蛾逐  
帙蠹請問甚爐冶輕將乾坤鑄黃土搏爲人成毀豈無  
數不如且嘯歌風雨不余妒

下山值魏燕廷更同上

登高興將盡歸路逐飛鳥素有同心人來遊日欲杳秋  
色無終窮因依俯木杪更與招白雲壺樽傾不了

廿年

廿年心力不輕拋每得新詩手屢鈔草藁糊塗經點竄  
軒車邂逅定推敲真知好處纔能如第奉虛文莫與交

長笑子雲能自守有時爭解外人嘲

近郊

雞犬桑麻卜近郊滿城冠帶不相消  
社詩妙處輕輕寫壁畫工時澹澹描  
白月乍來星幾點明河初落鼓三敲  
此中意味誰能識恐把新交閒舊交

夜寒

甫及初冬夜元冥勢已憑一床寒潑水  
兩足凍成冰熱不人家附清原我輩能  
歌聲出金石抗志欲希曾

夢游太華山寺

突兀雲烟夢不空孤帆出沒水聲中  
樓船幾處千年盛

詞賦誰家一代雄  
鸛鶴有心搖健翮  
魚龍無力鼓腥風  
寒山落月金仙室  
舊是梁王避暑宮

海水桑田不可知  
空山遊客夜相思  
獨來直欲陵名岳  
衆至還能鬥小詞  
貝葉譯經沈白馬  
薜皮封碣倒元龜  
沐家十代侯王像  
莫怪重重挂網絲

洞壑題詩附作家  
床頭簇簇落燈花  
不妨勺水皆名海  
何碍拳山亦號華  
人世古今飛野馬  
仙宮晝夜御雲車  
深深一穴魚金線  
更與良朋飫晚霞

隱君詩癖太華山  
未必搜羅到夢間  
游興倦多成讕語  
凡情勝卽隔仙關  
西方螺髻迷金色  
南國蛾眉失玉顏

搔首問天天且問誰如謝朓可提攀

憶丈人石

巢由遺此舊精魂片石何人立墓門  
竟似不平頭亂觸誰能無語舌常捫  
嫉賢金及山中隱懷古難同世上論  
野火燒林牛礪角老夫尙欲叩天閭

憶紅石崖藤樹

蛟螭䟽懶蟄三冬屈曲蒼藤欲化龍  
澗水碧於朝雨集山崖紅似暮霞封  
每思良友同題壁曾語村人更種松  
浩蕩天風來萬里千章喬木共高峰

寄卽園

茫茫大地一浮塵策足看誰據要津歲歷百年原是夢  
詩成千首未爲貧長愁我死無知己盡道君生有替人  
願得清時俱兩在圖形何必不麒麟

夢伯玉亭先生賦寄顧南雅先生

十月二十三日

百年數知已曾未一二得生離意悽愴死別神惶惑偶  
然入夢寐歡娛只頃刻覺後不復見燈暗月昏黑富貴  
與貧賤雲泥相懸極蔑也友喪仲心交在道德自非顧  
東吳此義誰能識

漫吟

只在中山拾瑤草不須海上遊蓬島如何秦漢方士多



闕語安期食臣棗

述徃一篇擬呈當事

吾州固僻陋民愚實易理 聖朝多循良父母歌樂只  
虎猛河可渡鱷頑海能徙患在百胥吏不成一官美憂  
樂罔相關利害私一已遂令億萬姓溝瘠扶不起昔也  
困鹽頭今則病總里請述徃日事泣然泣不已一身羅  
網羅全家罄骨髓皂隸持硃票捉人如捉豕丈夫遠逃  
匿婦女受辱些嘗倉卒未及避屈曲伏匱底匱門固鎖鑰  
性命在尺咫皂隸肆咆哮欄檻縱虎兇半日醉飽出背  
人暗啟視天地氣睽隔無辜人久死約正鳴之官官曰

自取耳何干皂隸事援例輕生擬官原不貪酷爲受吏  
驅使蚩蚩吾州民沈寃一至此此事非譌傳當日手叢  
指至今三十年衆口罵未止鑒前可善後今弊恐類此  
野人少忌諱里歌當裨史公兮明似鏡公兮清如水

八山三首

木葉辭林間石泉赴澗底日落山空時猿鳥自悲喜  
新鶴不隨行古琴且偕往四顧無知音一曲天風響  
片月如戀人寒光遠相送小歇樵徑間一肩白雲重

寒夜懷楊鳳池

夜寒禁人睡不會禁人吟吟久天未曉遠道懷同心昨

寄雲中書語苦緣情深讀罷長太息空際留餘音白石  
何皓皓柳村自沈沈孤鳳獨飛翔烏鴉棲滿林

寄馬子雲

我所思在雪山萬丈玉龍蜿蜒間我所思在玉湖千尋  
雪水渣滓無化爲神人下清都綽約處子冰肌膚化爲  
新詩與時殊一字一顆鮫宮珠泣盡不惜雙眼枯投向  
人世瑩青臚按劍顧盼胡爲乎有櫝不如且藏諸留待  
千秋知已須高懸十乘光彩俱靈蛇匍匐驪龍趨千金  
聲價愁難沽取石况敢輕擲揄嗚呼維人維詩有是夫  
我思雪山與玉湖

相思吟

相思何綿綿相見何草草契濶經歲年少壯亦衰老相  
思如在天爲日莫爲月日實不復虛月圓卽隨缺相思  
如在地爲山莫爲水水有東西流山無南北徙爲口爲  
山何可期人生安能無別離不長相見長相思

寄李卽園

在昔漢有孔文舉搥鼓狂生獨識取唐家亦有賀知章  
謫仙人乃布衣許衡白固是天下才龍潛鳳逝辭塵埃  
一生高歌日痛飲管樂事業何有哉千秋聞之尙感泣  
其人自非世能及我輩淚眼終年懸不向衛霍墳土濕

周公大聖身勤勞吐哺握髮延賢豪賣珠小兒歛聲價  
拒人自詡門墻高與君策杖五嶽走逢著飛仙始回首  
仰天大笑千萬場悠悠一世幾雞狗

鄰里餉蜜脾

茹苦志澹泊分甘俗淳美村翁割蜜脾餉遺及鄰里脆  
質雲液同圓形月華比入口冰雪甜蔗漿可遠徙含英  
相娛樂環列弱孫子清芬達肺腑殘瀝染手指遊蜂跡  
香至尙憶采花始醞釀辛苦多養羞實利彼空房不留  
餘窮冬恐餓死因思天壤間民物同一理要當全室家  
無致罄骨髓慎哉居高位下令如流水

夜夢丈人石醒爲短歌

昔年我哭丈人石四七星辰失精魄北斗挹淚傾不乾  
昨宵猶然濕沈席胡不長留在巖阿浮邱洪厓同嘯歌  
欲更生成豈可得造物氣力能幾何荆棘沙礫滿山在  
鬼護神訶是若輩人心世事皆如斯萬瓦完全一玉碎  
悲歌欲咽聲難吞晝和啼鳥宵哀猿泰山有石何足云  
青城有山空自尊惜哉五嶽無丈人

靜夜吟

一歲一寒暑去來何太速嬰游時有餘進修日不足寤  
想我孔子同此耳與目十年天一縱縱到從心欲疏食

飲水間堯舜其往復事業別有在窮通非榮辱時流尚  
文藝多爲干利祿取舍未分明存養豈純熟白晝聽悠  
悠靜夜攪胃腹知行雖生安要亦慎幽獨貿然百年內  
無徒競誦讀

### 紅葉

待入天台時節過霜風不斷意如何隔溪染遍紅梨樹  
十里青山落照多

### 櫻桃花

不恨霜林落葉空野花今已轉春風一川麥隴青於染  
中有櫻桃幾樹紅

詠梅

棄置在空山  
苔痕雜蘚斑  
林泉苦用意  
天地若投閒  
獨立風塵外  
相成雨雪間  
嶺頭三百樹  
猶自不堪攀  
南中風氣異  
此又冠羣芳  
歲歲開冬月  
枝枝向草堂  
影閒雙鶴靜  
聲亂衆蜂忙  
久在氤氲裏  
詩成一嗅香

山中尋梅三首

危徑寒雲深  
巖巖獨往處  
何年古仙人  
手種一梅樹  
林靜香徐來  
泉清影斜照  
逢迎無主賓  
澗壑答長嘯  
晚揖梅花歸  
去來路不識  
空山自開落  
我今已多事

對梅花憶卽園



狂飈昨卷老梅樹僵虬凍蛟杳何處小橋躑躅經兩年  
寒澗流泉嗚咽去夜靜山空明月時枯桐繚繞冰蠶絲  
玉人姍姍獨來下清商一曲中心悲天上人間不相見  
欲往從之泣如霰荒村隙地開一園佳種身親幾揀選  
信風今日何蕭蕭料理詩瓢并酒瓢離懷紛乘興未盡  
水西橋頭魂又銷龍泉樹墮古仙淚白玉闌干倒在地  
蛻翁草堂門常關崇實山高客難至亦知緝梅爲衣裳  
不如木葉能禦霜亦知煮梅作醴粥不如糠粃充饑腸  
耿耿何心捨不得入冬不見輒相憶春風自是分愛憎  
最喜雪霜有氣力百年冷落安阜園金樽檀板空黃昏

青蓮居士偶游戲重邀月魄招花魂仙凡如歸此鄉大  
我亦中間散髮臥鉢聲燭影君自豪每一詩成屈四坐  
追歡溯別今何如明當使鶴飛傳書不忘舊侶到應早  
勝於塞鴻與江魚

十二月得古村寄別詩距其寄時已四十有五日  
計此日北上久矣悵然賦

幾經延望數行書不獨相思恨在余峻嶺風高驚落雁  
寒江水淺碍游魚傳來別賦人行後送到離亭夢覺初  
遙想翩翩披鶴氅梅花雨雪擁軺車

卽園分贈二鶴相娛八月癸十二月二日夜有盜

入室竊其一去孤雌哀唳殊難爲懷形諸詠歎  
既憤且慚金寄卽園俾知此間况味與風俗云  
忽聞孤鶴唳力疾下床看鳴咽聲猶續徘徊影已單良  
朋方寂寞幽好又艱難異類能憐汝休教羽翮殘  
日夜尋無跡逢人問訊忙苦痕環舊啄花影覆餘糧望  
斷雲霄外魂飛釜竈旁焦桐何處得莫更刈蘭芳  
富歲禾麻賤窮鄉盜賊繁桑枯馴雉杳墻壞吠厖喧別  
鵠情多怨離鸞調共翻洞天如可借晝夜敞晴軒  
多謝開樊籠平分小隱人鳳鸞愁欲失鴟獍怒相嗔清  
福原難受仙都未易鄰園中雙在否雞狗漫情親

每歲梅花發常期鶴與遊今年初得意此際忽離憂  
賓主停迴棹林泉罷典裘孤雌饑不食空作稻粱謀  
渺渺孤山後高風不可躋露光晞大野月色冷前溪騎  
鶴千年舞聽猿一夜啼悲歡相倚伏得失理須齊

數日搜求窮極遠邇興幸萬一今五晝夜矣殆無

生鶴之望痛恨賦此聲與淚並

瘦骨埋何處無碑豈有銘霜前羣塚白雪後萬山青半  
是牛羊骼時爲鬼域形大壚同一哭不及其千齡

弔孤鶴

孤雲一片繞天涯落日寒烟聚晚鴉曲曲迴腸牽欲斷

更無心緒咏梅花

時不飲食五日矣傍徨躑躅哀鳴不已

晝生宵逝兩依依譜入琴聲識者稀  
哀和北來孤唳雁羞同南燕更雙飛

寄卽園

名臣似趙宜隨一處士如林好畜雙  
仕隱無成空有贈徒留隻影峙晴江

樂府多情怨別離杜陵觸目亦心悲  
鳳鸞杳杳無由訴且和君家李遠詩

次日再寄

長養名山夢穩過華亭華表兩嵯峨  
仙人尙帶開元箭

俯仰乾坤小劫多

巖穴風塵各是非  
清流亦自不知幾  
開籠早放仙人騎  
已向崑崙頂上飛

求鶴吟

昨日求鶴南山南  
長恐有人挾彈彈  
蘓眈今日求鶴北  
山北令威去久華  
表柱傾側東山之  
東西山西風慘霧  
黯常淒淒且歸暫  
息草堂下不奈孤  
雌昂首啼一啼九  
皋勢搖動再啼百  
靈肅怨恫啼久蕩  
蕩天門開鳳凰飛  
下岐山臺銜石精  
衛填海起代徃愬  
鳳聲悲哀齊婦含  
冤霜六月杞妻善  
哭城崩摧第有精  
誠皇穹照何不雄

鶴令歸來千歲變蒼復變白巢百丈松其徘徊羣雛胎  
生不卵伏齊銜芝草傾露杯主人服之壽命久朝游瀛  
洲暮蓬萊鳳凰無力天帝不語精衛細微泣下如雨我  
欲化大鵬背廣幾千里垂天雲翼搏扶搖北溟怒飛南  
溟徙腹下毳毛濕海水灑落空中十日止淨洗惡氛易  
淳美四海內外無遠邇羽者毛者鱗者介者倮者各各  
皆懽喜我亦變風變雅續騷反騷一切都閣起詠歌休  
明頌上理吾樂矣鶴樂矣吁嗟乎安得此

聞古村北上其甥黃孝廉象坤隨行遙寄

此去逍遙作遠圖風流更喜

范甯王

忱俱江河到眼成

兼得井鬼回頭限一隅  
道左據鞍同顧盼  
舍中爭席各踟蹰  
幾人似汝賢甥舅  
萬里聯吟到帝都

田間梅花

碧桃紅杏尙遙遙  
近帶青青豆麥苗  
不信陽春已先到  
祇疑白雪未曾消  
無情浪賦詩千首  
有託長呼酒一瓢  
直待香風都吹盡  
田間猶踏碎瓊瑤

門前梅花

直如桃李在門前  
與我依依共暮年  
無限風情松栢外  
許多雪意竹籬邊  
足音久不來空谷  
人影誰曾望謫仙  
靜夜推敲長作勢  
遙遙蓬蓽立嬋娟



寄菴詩鈔續附卷十一丙戌

雲南劉大紳

元日鄰家詠梅

老懷無別事長憶比鄰梅詩始新春詠花先舊臘開  
良朋同契潤勝日共徘徊正似今晨酒屠蘇盡後杯

夜聞犬吠

五載離羣賦索居羞馴黃耳好傳書夜深不肯垂頭睡  
風鶴驚心寺做廬

哭張漢渡先生

海岱重賦別茫茫廿餘春平陵朱生晚不辭音問頻開

緘黯雲結莫辨時昏晨棲霞吾取士已失平生親新城  
張夫子又作千古人盧坡靳著作脩然返其真夫子學  
業富古文光海濱叙述司馬潔道德董生醇誼錯時事  
切向歆經術陳直從西漢入奮迅返先秦獨自關塗軌  
力爲除荆榛是宜海內外茲誦奔詵詵顧嗤庸妄兒挾  
策隨車塵罔識已減否遑恤人怒嗔矯枉遂過正嚴守  
煩鬼神青箱罔屑鑰丹鉛麾薦紳我曾再拜請微笑旋  
長呻緬惟我夫子擁比將九旬風月豁光霽山斗高嶙  
峩諸生半齊魯規矩殊循循襟懷實磊落取與時斷斷  
以此束脩入莫贍家口貧降辱廣文陳持版行遠邇可

能公卿輩敬禮如穆申騎虬飛上天與帝爲內臣王宸  
樂莫樂後進師無因琳瑯千萬篇恐亦愁沉淪韓愈得  
李漢唐文遂振振賀詩投廁中纖兒胡不仁弟子多顯  
榮慷慨聞鄉鄰尋常棗梨木何至金玉珍先生此遺文  
定不泥土湮送葬路悠遠賦招辭酸辛淒淒浣江咽如  
臨湔水潺

### 海棠花

詠罷梅花纔十日竹間已賦海棠詩冠纓倚樹紅雲繞  
咳唾臨風絳雪隨極豔神仙堪並立最艷才子許相思  
妖姬睡態休輕擬莫更愁他未足時

春園戲用忙字韻四首

春風過處百花忙  
春雨飛來五色光  
此日如遊化人國  
吾家本住彩雲鄉  
催科不到灌園叟  
寢食都成娛老方  
何事前宵多勝友  
匆匆秉燭譜羣芳

老年人逐少年場  
蝶意蜂情各自忙  
應接一身全不暇  
逍遙千日又何妨  
精神煥發歸詩境  
姿態橫生入睡鄉  
殘夢欲飛東海上  
三壺縮地問長房

二頃田園任就荒  
花枝四面照迴廊  
鄰翁往往叩門響  
野老時時賒酒香  
山水不深人亦近  
雲烟何暇我偏忙  
近來拋却無窮事  
一日百回看海棠

花塢延綠接柳塘貧兒驟富氣揚揚汗樽不稱石家飲  
炆服宜熏荀令香紅紫遲來纔爛漫詩文先就總尋常  
深深醞釀天工意頃刻仙人却太忙

張柏軒明府過舍一宿遽返

山徑碍輿馬官道紆杖屨不肯恤筋力第欲話情慆前  
日春燈前書來訂過晤市人傾肺肝愆期借風雨忠信  
如我友何假誓言固茅檐設雞黍草草盤飧具一夜席  
初煖行旌已在路私憾非獨余衣袂留不住泉石空慶  
幸品題得章句明月有缺圓浮雲有散聚知交百年內  
離合豈無數悵然送出門蒼蒼望雲樹

海棠吟

十千琅玕綠深處種得海棠兩三樹西南萼跼猶未舒  
往來徘徊不知數若向東北魂已消翠雲圍繞彤雲嬌  
春風沈酣敵醇酒朱顏晝寢帷輕綃一顧傾城再傾國  
不待巧笑始迷惑唐宮漢殿長生憐恃寵專房少顏色  
嗟我胡爲環堵中四壁舊畫驚神工咫尺天涯不一到  
平時枉說芳心通好友昨來起相視蘇醉陸顛乃不啻  
何物持贈能如斯無情斷難爲我遲赤龍蜿蜒丹鳳翔  
凌空意氣同飛揚百鸞千虬雜桃李青霄萬里雲路長  
竟欲乘汝上紫府臺瑤室瓊傲下土定知天上才仙多

有詩堪與少陵補又恐憑虛無此花  
燒殘絳燭烟空斜  
不如招呼灌園叟日向小閣傾流霞

再吟海棠

沈香亭北花有數若箇清平脫  
韓賦木蘭丹上望遠人  
征帆渺渺去無路武陵之花移不來  
移來亦只尋常開  
赤城之霞飛不到飛到終不似天台  
凌霄宮闕帝賜宴  
玉露金尊出內殿中有一人衣絳綃  
不待傳呼直人見  
淋漓傾倒流霞間大醉勢如顛  
玉山瑤堦舞蹈不成拜  
蓬壺徑騎雌霓還帝憐雨荒有遺老  
童山涸水就枯槁  
詔書謫伴黃茅檐渴飢餐秀色好  
却笑當年范石湖

每歲花下攜妻孥何如全家久移住買絹寫作村居圖

病起園中

紗障牕虛日影移一宵卧病起遲遲春花識得相憐意  
斜倚東風不自持

戲題

九十韶光此際殊衰顏相映亦成朱却嫌髮短無簪處  
笑折花枝付女奴

出遊

扶杖優游出里門不忘柳市與桃源每思蚤歲聯朋友  
遂到衰年倚子孫草木尙難甘寂莫詩文何可厭頻繁



欲乘醉後題樓閣豪氣雄文懾宋元

挾書花下讀

晨飯粲白米少佐鮮魚羹腹實刀俎虛一飽何所營小  
園春花發寢食俱鍾情挾策紅樹下土軟青草平老眼  
昏矇矓幸借花光明安穩勝牛背不爲馳驅驚每當得  
意處琅琅時有聲自笑年八十猶如癡諸生於此或有  
福擁之如百城難字與小註多人炫雙睛一編持幾時  
午雞唱茅衡

病中作

春雨催花闌春風引人倦一心厭床第四體偏若戀豈

不私桃李夜夢千回見紅紫  
知我心飄揚入戶徧杖屨  
亦踴躍勢作龍鳧變齊飛小園中  
花片通繾綣我不化  
輪車經旬廢游衍

游絲曼百丈家家捲簾幙出見彩雲多  
繽紛天上落草木受渲染形態盡相若  
縱無生花管禿毫尙難闌一樹  
成一詩極力爲丹牒試請東皇村  
未必遜枌萼掩關爲  
何事仙家乞靈藥

丈夫志四海荆棘移農桑與世登春臺  
熙熙誦三皇華胥不同遊年衰心未忘  
尙欲小園圃人物生輝光韶華  
肯如約俯仰傾壺觴鬼神爾何司  
無端殊福殃上天愛

憎異汝輩休猖狂

彭陶仁贈膽餅

人生各有膽晶瑩耀星日同志卽傾瀉綢繆固膠漆風  
雨昨卧病霹靂破山疾經緯忽成象光輝照一室哲匠  
甄陶久土泥金石匹中空凝玉壺蛟螭伏不出清泉浸  
百卉春花結秋實榮華先天地功用未爲畢所貴揭腑  
肝萬年常如一苦汁垂圓形吐棄口頭蜜

久病小愈

三月三日

霜雪早盈頭三旬病不瘳黃泉豈少鬼白日苦相讐有  
我人何碍忘身德自修清吟乘小暇風月亦悠悠

久屈清明節病未能卽展拜先人邱壠也

相期一百年鼎俎萃新烟病已沈床蓐魂猶繞墓田無  
材能事鬼何力可呼天細雨斜風外山山叫杜鵑

參朮

餘年延草木參朮萬山空不破千金產難收一日功食  
生非大道祈死亦兒童先聖留真樂蕭然飲水中

蓬萊

幻出蓬萊路憑空見古仙長生須有用不死只徒然木  
石多頑物龜蛇盡大年若令聞至道吾亦汎樓船  
病中求藥物尙足放良心豈有列仙術相從方士尋英

雄豪氣盡魑魅惡氛侵十二高樓上浮雲蔽古今

詩來

詩來知病去不惜苦冥搜死樹生枝出枯泉活水流天  
移人世累帝轉鬼神愁萬古原如此羣情枉百憂

將赴岳陽

昂昂此七尺忽忽病中來身異游仙返心同作客迴移  
尊人鬼異攬鏡地天開不忘名山約深慚著述才

杜鵑花已殘

謀襲狐穴笑衰翁慰藉園鑪炭火紅多少鄰園花事盡  
閉門猶自怨春風

枉伊莘農中丞書招修通志謝賦

彩雲飛五朶，瀟蕩太華東。  
勝事逢衰後，虛名到病中。  
繆文稱下士，木柳愧高風。  
老馬迷長路，多歧更泣窮。

短吟

浣江於昆池不踰三百里，若無關山隔風送半帆水。  
奮迅辭龍游，搏擊謝鵬徙。何至古仙人，綢繆望雲裏。  
昔年盜賊多性命，寄螻蟻。今歲風雨和，飲食足豚豕。  
朝發夕可到，駑馬躡雲起。人老不如少，四肢一無倚。  
三旬卧床蓐，百裏填骨髓。鉛槧懷欲滅，鞭轡攬輒止。  
孤負賢公卿，相招讀文史。日月跳丸似，材能繫瓜比。  
安得丹邱生，貽

我大藥餌一服驅鬼魅再服健杖履

長吟

乾坤有大德萬古在人口遭逢聖明世小兒盡黃耆乍  
病不卽死便當痛飲酒醉騎黃麒麟散髮天外走崑崙  
萬仞巔磨崖千丈陡淋漓灑墨汁詩拙字亦醜驚倒游  
仙人延頸昂其首幼婦黃絹評蠢動古蝌蚪每怪楚狂  
客德衰笑孔某車下無一言長歌自不朽想當鼓唇際  
醇醪酌大斗聲停影滅後酒肆藏楊柳飲酒何負人醉  
舌善臧否我欲往從之千金起爲壽一夢入湘澤幽篁  
泣軒牖

詣山房

階庭閒閒詆花落幾黃昏觸戶蛛絲斷開牕燕語喧飛  
塵離舊几流水潔新尊草野無殘客相招試過門

入後園

高枕驚風雨荒園久不窺野蔬皆出土山果半垂枝竹  
柏心如故烟雲態自移硜硜從本性何事逐人爲

題漁家小影

興馬紛紛隔水涯常橫醉眼看蘆花有時舉網無魚換  
脫却蓑衣付酒家

又病

三月二十九日



是何病如大海水前潮未平後潮起無端又似深山雲  
東紫西拂不曾止丈夫談笑陵熊羆蜂蠆小螫那堪悲  
費禕謝安却強敵從容對奕如平時循理安常固聖哲  
矯情鎮物亦豪傑泣涕沾濕重茵間與小兒女不分別  
昨病既已安穩過今病依然又高歌欲歌不歌且痛飲  
笑看白髮盈階

風寒中人幾一百日困憊床褥間飲食日二粥必彊  
乃下咽百事不能爲偶有呻吟全無節奏潦草書赫  
蹠上小瘡後視之雖多愁苦之聲尙少衰颯之氣縱  
未能與天游固不至與鬼鄰也因彙附四集之末此

後長歌短吟竟欲一切屏棄惟取子朱子半日靜坐  
半日讀書之語以娛餘年其或靜坐久則繼以高卧  
讀書倦則救以默識總期於化名譽之心泯爭競之  
迹而已回念余學詩已四十年所存亦二千餘首多  
矣更多之復何爲乎名花好鳥時過境移則匿影銷  
聲致虛守寂結習難忘祇益嗤笑所惜者余既老而  
始窺詩人之旨也後有學者其早知嚮往哉道光丙  
戌端午前二日寄菴老人在高茶柴西樓

石羊山房看菊花歸賦寄

我無遺世情秋容亦相貺大造能娛人草木先踈放每

到籬落間輒如羲皇上四肢限樸拙空自抱蹇蹇非不  
讀陳謔方家難頡頏以此遂成懶能事甘心讓曩昔居  
城頭游神甸尾向沍露掇菁英一醉齊得喪燈月不賦  
歸取影作屏鄣及今幾何日身已怯扶杖詠詩有味處  
乞假杜陵叙積年無虛歲兒童誚誕妄山房經信宿素  
願隱獲償枕藉從菊隱猶復勞夢想

過彭陶仁看菊

不碍城邊路幾叉風流近日說彭家只疑隔歲恐無菊  
纔到前村知有華杖履多情人已老烟雲生色興尤奢  
清言更作重陽約安得同來盡孟嘉

因看菊途破詩戒賦此解嘲

最好今年菊信遲  
出遊愛與藉咸期  
正當凜凜清秋日  
不是沈沈困卧時  
交易醉人還有酒  
病難醫俗况無詩  
囊中正少悲秋賦  
爛漫多交莫更疑

憶菊

索居歎離羣無人日  
攻過賴得香草多  
師友儼金坐菊  
花此其一窮秋氣  
不到士志如少衰  
對之赧慚大老年  
畚種植園丁笑懶  
惰雅人餘深情飲  
食復寢卧涼月亦  
逢迎樽疊互相賀  
對雨魂夢牽賦歸  
憶倡和願假晚風  
力吹飛入我座抱  
枝不飄落蜚廉謝  
余悞

荒園菊花

樓船萬斛出三韓  
載得秋花大半殘  
瓊圃自邀名士醉  
茅廬獨結古時歡  
曉烟澹澹何妨瘦  
暮雨瀟瀟正耐寒  
屈指六朝歌舞地  
問誰黃葉樹邊看

臺榭荒涼玉露寒  
新籬落勝舊雕闌  
團來百草芳時易  
獨立千花謝處難  
士有逸情裁許種  
人無幽興莫輕餐  
何緣更酌葡萄酒  
爛醉西風晚照殘

桂花

神仙竟屬漢諸侯  
搗藥庭前鼎尚留  
雞犬升天賓客去  
團團桂樹小山秋

秋葵

百花變態逐春芳  
風雨欺淒易失常  
看到秋葵祇一色  
朝來傲盡滿園霜

牽牛

引蔓牽牛附棘枝  
自開自落少人知  
秋風寫出閒心思  
渺渺銀河獨立時

憶城宅桂花

全家移住浣江頭  
仙桂生香又一秋  
舊宅尙多親手植  
前宵夢到抱孫樓

腐鼠堆前鬼嘯風  
載將書去一樓空  
行人盡是沾襟淚

袖手無心寫葛洪

今年正欲返山城好友相招遠道行料理病身幾百日  
天香縹緲出昆明

枯莖朽甲事先知流水行雲無定期語石蟾蜍休滴淚  
碧梧桐已長新枝

對菊

故交墳上草連空一帶西山落日紅烈士有時成隱逸  
高歌何處哭英雄黃花寂寂遲呼酒白髮依依早傍翁  
醉讀史遷游俠傳無端吐氣又飛虹

吟詩

又觸高秋氣清吟到枕邊楚風詩不載蜀賦選爲傳興  
熒從蠻語歌謠自漢年一家言固好無奈減宵眠

重陽前一日

其有重陽興先於此日晴白雲千里盡黃菊一枝清入  
酒皆秋色傳詩忽變聲野人原自老四座不須驚

對菊

西山不種菊北海不釀酒清風遍六合嗜好一無有聞  
名賦相思見面起爲壽死生商周間師及百世後今人  
不如古寄托豈敢苟抱病窮鄉村搖落到衰柳加餐少  
秋英痛飲無大斗縱然成心詩計日歸速朽拙哉無才



能寂寞閉戶牖聚酒既非義乞菊亦爲醜何如墨胎呂  
遙遙且尙友

有所思

籠鶴每憶楊擔菊輒思李不籠復不擔獨立少知己擔  
之損其花籠之促其趾既擔亦復籠無乃喪厥美古人  
爲一事兢兢慎終始花鳥雖微物大者卽視此四顧儔  
侶間何可少二子

憶在曹南看菊花

昔年停車大河側鄉園欲歸歸不得綺紈脂粉空紛綸  
相逢不一動顏色故人知我執鄙吝分餉秋風菊爲特

石樓青堦東臯園各有黃華可娛客袁正思家一夜起

茅屋蔭葉覆枝纍千百此心如坐青潭西酒瓢詩筒勝

藥力沈疴頓愈活卅載萬里明農日相憶近來老廢田

十雙一時蕃息少稼穡千戶侯視千畝竹閒讀龍門傳

貨殖竹箭有筠如松心笑傲侯王弗疑惑棗栗橘荻漆

桑麻亦復不爲印組抑如何菊也語未及史遷毋乃漫

相識固知一片幽靜心羞與公卿列槐棘清霜自數短

籬曉白月同窺斜徑夕逢著鴻雁好寄書泰岱山南黃

流北

重陽無風雨欲往鄰村看菊花尙未果也

此時風雨舊難測  
晴空有日天不黑  
一穴死鼠驅萬人  
奔走東西悞南北  
厲鬼輕人重草木  
今年并爲黃花厄  
枝頭青霜慘自飛  
根下赤土黯無色  
履聲杖影歇九日  
尊壘埋地雲雷蝕  
尊壘杖履無由悲  
神仙尙爲雞犬惜  
同李翊清過彭陶  
仁宅清風未改秀  
色可餐持贈兩本  
提挈無由在座張  
叟年六十餘矣欣  
然爲負荷歸世有  
畫者作空山得菊  
圖傳矣賦詩一章  
旣以自賀又以賀  
陶仁也

黃花遙遙謝九日  
空槽壓酒酒不出  
落帽無人題糕稀  
淪淚迸作江海溢  
高人居近華陽山  
一井清於甘谷泉

平生種菊如種玉和成大藥延千年去年風雨時下上  
如何今年不再往飛舄成鳬杖成龍隴西佳士正森爽  
飄然遂到黃葉村玉露有色霜無痕千靈呵護百鬼走  
三閭五柳風流存此日登高事已古豈知古人亦近腐  
老翁妻孥樂團圓笑撮仙人冢上土我與仙人同一家  
來游只是航烟霞淮南位業尙難信子孫未必乘鸞車  
君先錢鏗八百載呼吸正陽漱沆瀣不知曾否餐落英  
比朱孺子更健在且肩一擔山中歸歲星朱履烟雲飛  
收藏茱萸釀美醢明年早與凌翠微

郭憲洞真記東方朔姓張父名莫母曰女

# 漫題

絕少移文到北山家鄉已是廿年還不才於世本無用  
多病此身翻得閑好夢全來秋雨後新詩半在夕陽間  
乞花索酒人皆笑一種癡情未易刪

月夜

今年孤負中秋月今夜仍坐廣寒闕寒蟬不鳴鴉不飛  
勃然清興一時發橫生兩翅凌空飛烟霞繚繞多光暉  
扳角厯軫星摘盡只留東南一少微少微寒芒逼高斗  
人間處士亦自有可憐鳳凰與麒麟盡逐犬雞地上走  
醒吟醉夢期百年悠悠此世多頑仙狐狸骷髏夜拜月  
山魃木客秋吟烟死生聚散問何處憂樂循環淚難住

留月且住我語君相從崑崙頂上去

南華老人真古仙漆園身隱書已傳風流才子強解事  
博覽悞及秋水篇人間宰相豈易有千兩黃金喜爲壽  
題詩得意東閣時可能卽君笑開口我輩不生天不秋  
前古後今如水流誰家豪士詔無忌何代美人稱莫愁  
柴扉茅亭幾老子留將明月九月裏閑吟無心勦名賢  
暢飲有意會鄰里白楊樹底聲蕭蕭時同里諸友  
有物故者黃花  
離畔詩寥寥截斷衆流語江水好送清浪過小橋小橋  
大橋影相接不用輕舟渡桃葉迢迢或借青鸞騎汗漫  
還將白鹿挾

對菊謝彭陶仁兼寄李即園

秋風吹秋花來其茅屋住環以竹千畝閒之松兩樹清  
氣空一時灑然領其趣殘花及殘客平生恥一顧甚愧  
幽人意如與古時遇安得我老友卽來成好賦

春風見花情秋風見花性三月嫣然笑九月獨也正春  
花及秋花同是天所命各試一番風分別柔與勁所以  
陸沈客於菊獨生散非關嗜好癖自緣心思靜雜沓來  
衆賓毋乃爲菊病蜜蜂弁粉蝶早向門外屏

又戲東陶仁

持贈秋花不及殘連朝累我酒杯乾昨宵又費如檠燭

取影高齋作畫看

舊從買鳥問詩家漸覺癡肥向客嗟秋到山中人又瘦  
半緣白月半黃花

夢郭月山先生

茫茫海內外百歲無多人南山郭先生氣運丁龐淳實  
我大父行相賞殊風塵白頭騎青驄顧我北城閫招我  
往別墅下臨藕塘清小子無才能肩昧陪嘉賓弔哭猶  
昨日行年亦八旬先生不可見南山自岫嶙昨宵幻夢  
底社酒邀鄉鄰杖屨飄然來宛如平生親回首歡譁地  
未死家已貧池館屢易主禾黍雜荆榛古人得所托墮



淚猶沾巾吾鄉固僻陋鞍馬空逡巡詩文不出土姓氏  
聽沉淪原嘗三千客慚愧梁園春是非在多口恩怨歸  
一身傷心輾絃處高懸秋月輪尙憶嵇叔夜長懷劉伯  
倫

河南劉朗能畫龍頭

蘆雁與先生最善

龍頭矯天漢雁尾集海濱青白

老眼界蓋同時笑嘆感此不復寐村雞報霜晨

先生爲余少年時一知己每過舊游處輒相池弔惜  
詩文皆不足傳亦是生平缺陷處夜夢入夢卽於枕  
上成此差足慰先生於  
地下矣九月十二日

### 對菊作

閒情萬種付東流古往今來幾白頭士要能詩纔稱隱  
天如無菊不成秋蓬壺渺渺仙難到雞犬熙熙客自留

空谷移家今五載依松傍竹儘銷憂

落英幾許佐盤飧飽食神仙亦寓言留得清風時入座  
招來明月不離門楚人事業餘騷在晉代風流剩酒存  
未必桃源能有此山中且與長兒孫

村酒沽來飲一卮窮通壽夭在先知心如可死原無事  
身不能閒豈有詩野馬飛騰天地老浮雲變換古今悲  
菊花正值初開候兩眼青青看轉移

何曾一賦賣千金漫道從容翰墨材強作詩初無是處  
祇能病亦見真心深山木石原同隱勁草風霜不敢侵  
嘉客平時來往慣賴通姓氏逕相尋

賦菊二首 鶴翎 墨

自惜雄飛入杳冥，羈雌啼夜不堪聽。  
秋風一醉籬邊卧，忽見當年舊鶴翎。

曾經玉杵搗元霜，染遍枝頭不墨光。  
和露寫成高士相，鬚眉都帶古松香。

對菊

伴汝空山中，我衰汝則秀。  
枯爛數百草，清風獨左右。  
昨夜寒霜多，危坐徹曉漏。  
雖無好詩句，逸興亦相湊。  
一吟得意鈔，成紙寸厚食。  
肉羞同肥飲，露喜共瘦春。  
秋任一嬾代，明年知復又。

禁詩

禁詩如禁酒閱歷始知難來處原無所成時每自歡千  
秋幾咳唾一代此心肝舊紙頻頻寫求人醉後看

將游昆明不果

將游心事寄孤藤秋雨秋烟歷幾層歲月無情來短髮  
交游有夢到殘燈城邊白社空延客湖上青山半屬僧  
幸是籬間花未老頻澆濁酒我還能

冬煖

地處南偏近日輪又逢十月小陽春慶雲湛露如娛客  
細雨微霜不中人覆被床頭猶有絮調羹金底尙多薪

冲融墨汁無水凍弱腕時將鐵硯親

蠻烟瘴雨一齊消曝背餘閒向客驕典盡孤裘謀醉易  
埽殘兔穎得詩饒丹楓有葉橫前嶺綠水無冰下小橋  
回憶悲歌燕趙日朔風凜凜暮連朝

### 草堂

野人歡負日裘敝又何妨魚不獻冰取菰時冒雨將夜  
譚簾有月曉卧瓦無霜未覺秋冬異安然一草堂

### 黃精

山中藥苗多黃精益人壽長饒自斲取不復計升斗  
全家服食之童稚盡耆耆漢芝及姬歌禹餘糧堯韭虛名

鮮實用刀圭枉入口物盛時易輕值賤難受一擔求  
百錢往輸賣菜叟遂令饕餮厭餽飼到豬狗神仙自珍  
重盤殮置左右咀嚼千百年天地共長久黃帝不敢臣  
炎帝不敢友多謝白木柄朝夕不離手只恐秋冬間冰  
雪尺許厚深埋無所得慚惶對孺婦何以方青瞳何以  
黯白首空憶蓀與杞人出犬復走吁嗟此黃精宜置本  
草右作詩長詠歎金石志不朽

十月盡

人壽無百年一年無幾日忽忽經春秋三冬又去一置  
身在何許遙望聖人室迢迢不得入聲稱恐難必史冊

浩淵海常人姓氏逸無端相推重或是其親暱褒榮假  
片語千秋誚曲筆今此必有作後來始可述七尺皆天  
生念此心慄慄落葉墻陰間寒蟲助唧唧

自山中歸過去年夜行處

同此一山徑不向黑夜往白日生光輝陰巖匿魍魎一  
心雖兢兢有時却拄杖曲折隨行止高低肆瞻望田塍  
側足越枯草踏猶響石杠牽臂過飛沫不濺頰黃葉飄  
前林秀色來莽蒼上有寒蟬鳴清音自踈爽迴頭憶曩  
昔尺寸難下土推挽憑兒孫燈火暗不朗微螢傍星月  
徒有天際想何期今日間乾坤任俯仰一片蘚苔石墻

之欲題榜揭示後來人浩歌共慨慷

暖日

悲秋秋已去歎老老還臨最愛三冬日長懷一片心水  
依暘谷暖雲擁益州深膏澤時爲雨霏霏雪不侵

早起

今夜雞聲早天晴起不遲宿雲停故處飛鳥過他枝夢  
好全忘記情閒別有詩吟成寄何所金碧舊相知

寄遠

衰年安故土枉辱友朋書山水相知久詩文自覺疎飛  
騰前輩盡憂患此生餘得似淮南客成仙或不虛



曝背

致此原非易吾鄉得不難一輪紅日近萬里彩雲寬快  
意神爲舞衰顏色亦丹層臺九成上翹首恐高寒

古城

在州南三里相傳爲武侯所築人沉水田中至今猶或見其影也感而賦詩

水底孤城何處求至今人說武侯能安爨爨纔安蜀  
不相孫曹只相劉公死無人興禮樂漢亡有客續春秋  
習生杜老皆豪傑懷古心傷淚暗流

天威遠播即時還邊境誰曾數置關破砦長留千載後  
殘碑永鎮百蠻間置身管樂猶輕比繼統高光不厚顏  
陳壽降臣何足道可憐涑水愧尼山

登樓山祠

名山應與薦芳馨景帝無端溷廟庭  
入砦誰識諸部長  
倚樓自愛一峰青皮包利戟犬相易  
樨飼神駒龍有靈  
野老訛傳如可信西沙遺事亦堪聽

祠中祀山神範土作夷人相村民稱爲景帝所傳神  
事與段氏事不異思平滅楊干貞後雖僞稱帝然未  
有景帝之號惟蒙氏會龍傷諡景莊皇帝又與所傳  
神事無一類者以訛傳訛甚可駭笑西沙夷會子分  
治在今下村地村民附祀於土主廟稱爲太子同一荒  
唐無稽云爾東山亦有西沙籠籠夷語城也近誤沙  
爲山

西嶽廟

天南灑淚哭銅山百萬游民死不還曠土生金爭欲攘

良田樹穀棄爲閒粗荒細鑛隨時盡勁弩強弓向夜彎  
牛酒酬神西嶽廟人人醉飽有歡顏

夢張漢渡先生

先生死已久長夜猶入夢容止如平時語言辟庸衆但  
覺甚歡樂不知有悲痛寤後思天涯風雨泣翁仲

畫寒

寒氣塞天地萬物生理微日光匿不出元冥肆其威極  
南於極北自古殊化機溫泉裂土湧彩雲連山飛瑞爲  
雨雪少慄作冰霜稀盡使似今日炙背安可幾挾土熱  
石炭齊向爐邊圍四季無寒暑此語全疑非一旦捲昏

霧萬里迎赤暉大哉天地心深知我無衣狐貉亦自幸  
山中得所歸

夜寒

不能夜不睡最苦凌冬寒夜寒無長夢布被又復單人  
火不可乞天日何妨于雞鳴即早起立向東方看昨朝  
披衣候已上曦三竿匿影恐爲我幾時得盤桓南有溫  
泉水伸縮殊自寬相去十餘里如何行路難

晝夜寒

地色既不赤天光亦不青晝夜盡寒氣於何窺杳冥南  
人素喜煖婦孺嬉中庭恐今火亦冷冰炭無定形魚遊

損其髻鳥飛折其翎一州此百里萬里多生靈收歛爲  
長生天地有典型我豈不知此而乃歎鈴峴吟聲雜風  
響颼颼總難聽不如飲美酒千日醉纔醒

遠山雪 十一月七日

乾坤大才思作雪殊亦難欲成一尺白先釀三日寒初  
不落平地引人高處看冷氣方逼迫凍手何以搏朔風  
能會合豈不能摧殘恐隨白雲盡徒留好林巒我方足  
縮縮聞之遙爲觀可望不可即肩聳眉猶攢吟詩懷古  
人摹擬全無端謝賦遜牟贊陶語終勝韓小子復何爲  
顏赧風騷壇願與細咀嚼清氣歸肺肝

愛日

又作茅檐曝背人凌冬愛日煖如春天心自爲無衣計  
帝闕終須有疏陳顧影雙肩生氣焰撫膺滿腹見精神  
推恩遍及東西朔何但南方草莽臣

又五言一首

幸生西南隅冬日煖如此寸厚冰潛消瀉地無寒水感  
深白屋內持語朱門底重屋擁爐火中有貴公子美人  
更迭侍冰絃拂玉指醉飽未及終歌舞又復如臆風怯  
一試熱氣炙骨髓豈知天地心惟恐人凍死語以日可  
愛搯手且掩耳方脫輕紫貂厭陳活赤鯉餒腹衣敝緇

相對亦何恥

又曝背

四肢皆就煖惟背獨先承每慮崇朝失常思半夜臨棄  
裘殊亦易向火究何能我輩身親試逢人輒自矜

哭張心傳廣文甥

汝死非今日吾衰會哭遲一州無雅望多士失經師幸  
得諸孤慰稍寬寡婦悲茫茫終有憾天道總難知

悼鶴

十二月五日

飛雄不得見翱翔賴有孤雌伴草堂賓客忽來沈醉後  
青霄無路恨茫茫

寄董詩劍續前卷十一  
五  
冥情警露別秋風清淚無端一旦空幸是梅花開較早  
連宵抱影月明中

曠絕風騷賦遠遊平生徒自詡清流小橋梅樹東山石  
一樣傷心淚不收

衆目睽睽各自迷嫉生幸死理難齊山中伐盡蒼松樹  
省得他年鶴又棲

空腹棠梨代瓦棺荒園落日晚烟寒家貧少裹元黃幣  
愧檢焦山楊本看

哭李卽園

交游半天下何處更得汝艱難科目間文章委黃土死



生憾天地天地不自主鴟梟欺大鵬騶虞避豺虎賁育  
古勇上翻爲童子侮壽夭分仁暴前人論亦腐哀至我  
便哭夢魂來無所